

Նախագծային աշխատանք  
Հայոց լեզու, 7-րդ դասարան

Ձևաչափ՝	գործնական նախագիծ
Թեմա՝	խոսքի մասեր
Նախագծի անուն՝	Ռեստորանի ճաշացանկի ստեղծում
Տեսակը՝	անհատական-խմբային
Տևողությունը՝	միջնաժամկետ
Վերջնաժամկետ՝	2-րդ կիսամյակ

Նախագծի նպատակները՝

- ❖ Ամրապնդել խոսքի մասերի իմացությունը:
- ❖ Չարգացնել ճիշտ գրավոր խոսք կառուցելու հմտությունները:
- ❖ Նպաստել սովորողների ինքնուրույն ճանաչողական գործունեության հմտությունների, ստեղծագործական երևակայության զարգացմանը:
- ❖ Խթանել սովորողների պատասխանատվությունը սեփական ուսումնառության նկատմամբ, զարգացնել ժամանակի կառավարման հմտությունները:
- ❖ Ձևավորել համագործակցային և սոցիալական հմտություններ:

Նախագծի վերջնարդյունքները՝

## Աշակերտները կկարողանան՝

- ❖ տեղին կիրառել խոսքի մասերը գրավոր խոսքում, տարբերել խոսքի մասերի հատկանիշները ստեղծած ճաշացանկում,
- ❖ կառուցել ճիշտ գրավոր խոսք՝ ստեղծելով ռեստորանի ճաշացանկ,
- ❖ ցուցաբերել արդյունավետ ինքնուրույնություն, ստեղծագործական երևակայություն և մտածողություն,
- ❖ ցուցաբերել պատասխանատվություն թիմային աշխատանքում, արդյունավետ կառավարել և՛ իրենց, և՛ թիմակիցների ժամանակը,
- ❖ դրսևորել համագործակցային և սոցիալական հմտություններ:

## Ռեստորանի ճաշացանկի ստեղծում

### Առաջադրանք

Պատկերացրե՛ք, որ ձեր թիմին առաջարկել են նորաբաց մի ռեստորանի համար ստեղծել այնպիսի ճաշացանկ, որի վառ ու գունեղ կազմը անմիջապես կգրավի հաճախորդների ուշադրությունը, իսկ համեղ ճաշատեսակների անվանումները կգրգռեն նրանց զգայարանները, և նրանք անհազ ցանկություն կունենան համտեսելու ռեստորանի համադամ խորտիկները:

Այս նախագծի շրջանակում ձեր առաջադրանքն է ստեղծել այդպիսի մի ճաշացանկ՝ հետևելով այս պահանջներին.

1. Ձևավորե՛ք հետաքրքիր, ինքնատիպ, գունագեղ ճաշացանկի կազմ, որի վրա գրված կլինի ռեստորանի անունը(անունը որոշե՛ք ձեր խմբով), և տեղադրե՛ք համապատասխան նկար:

2. Ճաշացանկը պետք է կազմված լինի տարբեր բաժիններից, որոնք պետք է լինեն նկարագարող, ակնահաճո: Այդ բաժինները պետք է լինեն առնվազն 7-ը: Կարևոր է, որ բաժիններին տրվող անունները լինեն յուրօրինակ և հետաքրքիր, ինչպես օրինակ՝ **Խրթխրթան**

**նախուտեստներ, Օրվա սպուր, Անուշահամ աղցաններ, Պաղպաղակի սրահ** և այլն: Բերված օրինակների անունները կիրառել չեք կարող:

3. Յուրաքանչյուր բաժնում ներառե՛ք համապատասխան ուտեստներ, նկարներ: Մտածե՛ք, թե ինչպիսի ինքնատիպ, պատկերավոր անուններ կտաք այդ ուտեստներին, օրինակ՝ **Մրսուտ կարտոֆիլի ռուլետներ սնկով, «Երեկոյան դոդանջ»** աղցան և այլն: Ամեն բաժնում ներառե՛ք 3 ուտեստ:

4. Ներառե՛ք իրատեսական գին և սեղմ նկարագրություն յուրաքանչյուր ուտեստի համար:

5. Երբ աշխատանքը ավարտեք, ճաշացանկում **կարմիր** գույնով կոկիկ ընդգծե՛ք 10 ածական՝ հարաբերական և որակական:

**Օրինակ՝**

Տնական կլոր գաթա՝ ընկույզով շաղախված խորիզով – հատը՝ 1000 դրամ

6. Երբ աշխատանքը ավարտեք, ճաշացանկում **կանաչ** գույնով կոկիկ ընդգծե՛ք 10 գոյական՝ գործածված տարբեր հոլովներով:

**Օրինակ՝**

Տնական կլոր գաթա՝ ընկույզով շաղախված խորիզով – հատը՝ 1000 դրամ

7. Երբ աշխատանքը ավարտեք, ճաշացանկում **կապույտ** գույնով կոկիկ ընդգծե՛ք 10 թվական՝ բացարձակ, բաշխական, կոտորակային:

**Օրինակ՝**

Տնական կլոր գաթա՝ ընկույզով շաղախված խորիզով – հատը՝ 1000 դրամ

8. Երբ աշխատանքը ավարտեք, ճաշացանկում **դեղին** գույնով կոկիկ ընդգծե՛ք 10 անդեմ բայ:

### **Օրինակ՝**

Տնական կլոր գաթա՝ ընկույզով շաղախված խորիզով – հատը՝  
1000 դրամ

9. Երբ աշխատանքը ավարտեք, ճաշացանկում  
շագանակագույնով կոկիկ ընդգծե՛ք 3 դերանուն:

### **Նախագիծը ներկայացնելու ձևաչափը**

Աշակերտները ճաշացանկը կարող են ստեղծել թղթի վրա. գրել  
ձեռագիր, նկարել, գունազարդել:

Կարող են ճաշացանկը ներկայացնել էլեկտրոնային  
տարբերակով՝ կիրառելով SS գործիքներ:

Դասարանում յուրաքանչյուր խումբ ունենում է 10 րոպե  
ժամանակ՝ իր ստեղծած ճաշացանկը դասընկերներին ներկայացնելու  
համար: Խմբի բոլոր աշակերտները համառոտ ներկայացնում են, թե  
որն է եղել իրենց դերը նախագիծն իրականացնելիս, և ինչ ներդրում են  
ունեցել իրենք ճաշացանկը ստեղծելու գործում:

### **Նախագիծն իրականացնելու քայլեր**

Ուսուցիչը ձևավորում է 4 հոգանոց խմբեր:

Ուսուցիչը աշակերտներին մանրակրկիտ ներկայացնում է  
նախագծի պահանջները, նախագիծը ներկայացնելու ձևաչափը,  
գնահատման չափանիշները, ինչպես նաև նախագիծը ներկայացնելու  
վերջնաժամկետը:

Աշակերտներից յուրաքանչյուրը խմբում ստանձնում է որևէ դեր  
իր նախասիրությամբ, օրինակ՝ **նկարիչ-ձևավորող, հետազոտող,  
գրառող, ստեղծագործող** և այլն, ու տեղեկացնում է ուսուցչին:

Յուրաքանչյուր աշակերտ խմբում պատասխանատու է և՛ իր ստանձնած դերի համար, և՛ խմբի միասնական աշխատանքի համար:

Յուրաքանչյուր խմբի համար ուսուցիչը նշանակում է խորհրդատվական 1 կամ 2 հանդիպում: Ցանկալի է հանդիպում նշանակել, երբ աշակերտներն արդեն որոշակի աշխատանք կատարել են, և ուսուցիչը կարող է նրանց տալ հետադարձ կապ, ուղղորդել:

Նախագծային աշխատանքն ավարտելուց հետո աշակերտները լրացնում են ինքնաանդրադարձի թերթիկը և հանձնում ուսուցչին:

Ըստ թեմատիկ պլանի՝ նախագծային աշխատանքը դասարանում ներկայացնելու համար տրվում է 2 դասաժամ:

### Ժամանակացույց

Խմբի անդամներ	Դերեր	Խորհրդատվական հանդիպումների օրեր	Ներկայացման վերջնաժամկետ

### Գնահատման չափանիշներ

*Ճաշացանկի արտաքին ձևավորում, նկարների առկայություն – 20*

միավոր

Աշխատանքը կոկիկ է, առկա է գույների ներդաշնակություն, ունի ակնահաճո տեսք, նկարներն ընտրված են տեղին:

**Ռեստորանի, ճաշացանկի 7 բաժինների անվանում**- 15 միավոր

Անունների ընտրության հարցում խումբը ցուցաբերել է ստեղծագործական մոտեցում:

**21 ուտեստների անուններ, կարճ նկարագրություններ** -25 միավոր

Յուրաքանչյուր ուտեստ ունի ինքնատիպ և պատկերավոր անվանում, ուտեստի նկարագրությունը արված է հարուստ բառապաշարով, գայթակղիչ է հաճախորդի համար:

**Խոսքի մասերի գործածություն** - 25 միավոր

Յուրաքանչյուր խոսքի մասի ամբողջական կիրառման համար տրվում է 5 միավոր:

**Ներկայացում** – 15 միավոր, որից 10 միավորը տրվում է աշակերտի անհատական ներկայացմանը, իսկ 5 միավորը՝ խմբի ներկայացմանը:

Աշակերտը կարողանում է արտահայտիչ ու համակարգված խոսքով հստակ ներկայացնել խմբում իր ունեցած դերը, գնահատել իր կատարած աշխատանքը:

Խումբը հանդես է գալիս միասնական, համախմբված:

### **Ինքնաանդրադարձի թերթիկ**

Ի՞նչ գիտելիք և հմտություններ ձեռք բերեցի ես նախագծային աշխատանքի ընթացքում-----:

Հաջորդ անգամ ի՞նչն այլ կերպ կանեմ-----:

Ուսումնառության ընթացքում ի՞նչն էր դժվար ինձ համար:

Ի՞նչը օգնեց ինձ, երբ ինչ-որ բան շփոթեցնող էր ուսումնառության ընթացքում:

***Ջարգացման ենթակա կողմեր՝***

Ես դեռևս վստահ չեմ, թե ինչպես-----:

Ես կարիք ունեմ օգնության կամ աջակցության, երբ-----: